

## ALAROBIA - LAVENONA - TAONA D 2019



### *Ny Rainao izay mahita ny miafina no hamaly soa anao.*

Ry Kristianina havana, amin'izao Alarobia fanosorana ny lavenona izao no hanombohantsika ny fotoanandro hiomanantsika sy hivelomantsika ny misterin'ny famonjena antsika mitondra antsika amin'ny fankalazana ny Paka. Fotoana izay hamakivakiansika mandritra ny 40 andro ny karemy handalinana ny finoantsika, katolika aho ka halaliniko izay inoako. Ny isa 40 dia fiombonantsika amin'ilay 40 taona namakivakian'ny vahoakan'Israely ny tany efitra, "désert" tany karakaina mampatahotra satria tsy fantatra izay hiafarana, hainandro tsy misy rano ka manjary mahita zavatra maro tsy tokony ho hita ny fandalovana azy, maro ny fakampanahy sedraina. Nandritra ny 40 andro ihany koa no nosedrain'i Jesoa alohany hanomboany ny fitoriany ny vaovao mahafaly ireo fakam-

panahy maro samihafa nanjo azy. Isika koa mandritra ny 40 andro ny karemy izao hiezaka haka tahaka an'i Jesoa, haka tahaka ireo vahoakan'Andriamanitra ka antenaintsika ho tafita isika satria izany no misterin'ny Paka izany hoe fandalovana : miala amin'ny fiainana tsizarizary any an'efitra ambaran'ny sedra sy fakam-panahy ka miroso

amin'ny fiainam-baovao. Manantitrantitra amintsika fa ny fankalazana tsy hoe fahatsiarovana fotsiny fa fivelomana, fiainana an'izay niainan'i Jesoa, izany no maha-Katolika Kristianina antsika, hiainantsika izay inoantsika, Katolika aho ka mankalaza izay inoako.

40 andro hidirantsika amin'izao Alarobia fanosorana lavenona izao dia tandindon'ny fahalevonana toetrantsika olombelona misy fetra izany no dikan'ny lavenona. Ilay sampankazo nentina hiderana an'Andriamanitra tamin'ny fankalazana ny Alahadin'ny sampakazo no nangonina ka nodorana ireny sampankazo levona izy ireny avy amin'izany no nahatonga ny teny lavenona. Ho levona koa isika manambara fa olona voafetra isika ary indrindra noho ny fahotana tamin'ny fototra izay nitondra amin'ny fahafatesana.

Hosorana antsika io lavenona io ka lazaina amin'izany hoe "Mibebaha ary minoà ny evanjely", izany no lalan-kombàna hizorantsika hamakivaky izao 40 andro izao, hibebaka ary ny fibebahana dia amin'ny alalan'ny tenin'Andriamanitra. Tamin'ny Alahady lasa teo mbola nandalina mikasika ny teny

Vakiteny I : **Joely 2, 12-18**  
Tononkira : Sal. 50,  
Vakiteny II : **2 Kôr. 5, 20-6, 2**  
Evanjely : **Mt. 6, 1-6, 16-18**

isika, ny tenin'Andriamanitra no hanilo antsika amin'izao 40 andro entintsika mamakivaky ny efitry ny fiainantsika izany hoe ireo fakam-panahy maro ho folahintsika, ho levonintsika miaraka amin'ny fahasoavan'Andriamanitra.

Izany no mahatonga an'I Joely mpaminany milaza ao amin'ny vakiteny voalohany boe *"ny fonareo no rovirovito fa tsy ny fitafianareo"*. Ezaka voalohany ataontsika amin'izao famakivakiana ny 40 andro izao dia tsy ny avy ety ivelany no hovaintsika fa ny fontsika mila miova ny fontsika izany hoe ireo "encombrements" izay misakana antsika tsy hiroso amin'ny tena fiainana maha zanak'Andriamanitra izay antenaintsika amin'ny Paka mitondra antsika amin'ny fitsanganan-ko velona. Izany no maha Eglizy Olona Velona isika ka tsy maintsy esorintsika ao ampontsika ao ny ratsy rehetra ka ho fo vaovao no entintsika mankalaza ny Paka, izany no atao hoe fibebahana.

Ary vokatry ny fihainoantsika ny tenin'Andriamanitra no hahafahantsika miaina an'izany. Lazain'ny pretra rehefa manosotra lavelona amin'ny handrintsika izy dia milaza hoe "mibebaha ka minoaà ny evanjely". Iezahantsika hampiharina amin'ny fianantsika andavanandro izany famolahana ny fontsika izany mba ho fo vaovao. Anarin'i Jesoa isika ao amin'ny evanjely, *"Ny rainareo mahita ao amin'ny miafina no hamaly soa anareo"*. Mametraka sy manambara fandaharam-potoana ho antsika ny evanjely amin'izao fanombohantsika ny karemy izao :

Manasa antsika hiova amin'ny alalan'ny asa fahasoavana no hanehoantsika fa miova ny fontsika. Manasa antsika hiova amin'ny alalan'ny vavaka, amin'ny alalan'ny fifamelan-keloka no anambarantsika fa miova ny fontsika ka ny fifadian-kanina ataontsika dia fifadiana amin'ny fahotana. Tsara ny mamerina fa ilaina ny fifadian-kanina satria misy ny milaza amin'izao fa efa lany andro, misy milaza fa diso aza, sanatria tsy miova ny fampianaran'ny Eglizy momba izany. Iaintsika ny mamolaka ny vatana mba ho folaka ny vatana sy ny saina ka ilaina koa ny fifadian-kanina mba hanambarantsika fa miezaka mamolaka ny saina koa isika. Amin'ny fotoana karemy tahaka izao no hanaovana ny fifadian-kanina ary ataontsika ao anatin'ny fahanginana, ny fontsika no tadiavina hiova fa tsy zavatra ety ivelany fotsiny. Tsy inona no ambarany ny fo fa ny toetrantsika, ny maha-isika antsika

Marina ilaina ny ety ivelany maneho ny ao anatin'ny fa ny ao anatin'ny no ilaina hiova.

Apetraky ny evanjely amin'izao fanombohan'ny karemy izao ny programantsika hanehoana izany fihavaozan'ny fontsika ka hahatonga antsika ho Eglizy Olona Velona. Araraoty izao fotoana izao, izany no ambaran'i Md Paoly amintsika, *"Izao no andro tsara, izao no fotoana tsara, mihavana re amin'Andriamanitra"*. Olombelona isika ka mila famantarana ka ny sakramenta no manampy antsika hiaina izany. Hanaovana antso avo isika mba hirosoantsika amin'ny sakramentan'ny fampihavanana. Mivelona ny sakramenta ny fampihavanana isika raha miverina amin'Andriamanitra ka ambarantsika amin'ny fiainana, hihavana amin'ny tontolom-piainantsika isika ka tsy hamotika ny zava-boahary fa hikolokolo amin'ny alalan'ny fambolen-kazo.

Mihavana re amin'Andriamanitra izay midika isika mihavana amin'ny mpiara-belona ka manorina tontolom-piainana anjakan'ny rariny sy ny hitsiny ka amin'ny alalan'ny fifamelan-keloka sy ny fifamindram-po ka miaina ny marina mba hialana amin'ny risoriso sy ny henamaso ary ny fihatsaram-belatsihy fa hampanjaka ny fahamarinana isika ka hanorina ny fanjakan'Andriamanitra eo anivon'ny fiaraha-monina, ny fianakaviana sy ny fiainantsika andavanandro.

Rehefa mihavana amin'Andriamanitra sy amin'ny mpiara-belona dia miezaka ihany koa mihavana amin'ny tontolo iainana araka ny hafatry ny Papa amin'izao karemy 2019 izao. Mifanaraka tsara amin'ny ezaka diosezy maintso eto amin'ny diosezy. Miala amin'ny herisetra manapotika ny manodidina isika fa indrindra ireny motro manapotika ny ala ireny fa miezaka miaro izay ala kely sisa ankehetry entina manorona ny ho avy. Miomana amin'ny Fakalazana ny Papa isika raha manatanteraka izay. Manambara fa niova tokoa ny fontsika

Mirary karemy hitondra antsika amin'ny fiombonana amin'Andriamanitra ka hahatonga antsika ho génération mpanorina tokoa isika, hanavaozantsika ny fontsika fo misy an'Andriamanitra, fo mamela heloka ary hanana fiombonana tanteraka amin'Andriamanitra anie isika. Amen

Mompera Arseveka Mgr Benjamin Ramaroson